

ցաւ, կարծես, և քարերի ընտրութիւնը, Տեղերից հանեցին և Նոր Զուղայ տարան ընդ ամենը տասն և հինգ քար, որոնցից երկուսն այն քարերն էին, որ կազմում էին վէմ քարը, երեք բեմի քար, երկու բեմի հիւսիսային և հարաւային աստիճանների, մի հատ Իջման տեղի քար, մի հատ աւազանի քար, չորս հատ դրսի անկիւնաքարեր (վէմ անկեան) և երկու քարէ աշտանալներ Իւղաբերից աւետարանի կերոնների համար:

Քսան և հինգ տարու չափ Նոր Զուղայում մնալուց յետոյ՝ 1638 թուին սեպտեմբերի քսանին Ս. Աջը վերադարձաւ Ս. Էջմիածին, ուր և մնում է մինչև օրս: Այս անգամ Փիլիպպոս Հաղբակեցի կաթուղիկոսի (1633—1655 թ.) հնարագիտութեանն և ջանքերին ենք պարտական: Ազգի հայրը, որ իւր եռանդուն գործունէութեամբ դեռ Մովսէս Գ. Սիւնեցու ժամանակից յայտնի ծառայութիւններ արաւ Ս. Էջմիածնին և չթողեց, որ Տաճկաստանի Հայոց մէջ առանձին կաթուղիկոսութիւն հաստատուի Տարոնոյ Ս. Պարապետի վանքում, ոչ թէ խնայում էր Նոր Զուղայի Հայոց նուիրական մասունքներ, այլ կամենում էր վերականգնել Ս. Էջմիածնի կեդրոնական նշանակութիւնն Հայոց եկեղեցու համար, երկիւղ կրելով, որ չլինի թէ Ս. Աջի պատճառով Նոր Զուղայի վանքը կաթուղիկոսարան դառնայ, իսկ Մայր Աթոռը զրկուի իւր աւանդական պա-